

شارع الصابحه

اسم العمل	:	شارع الصابحه
النوع	:	سردية شعرية
تأليف	:	إكرام بشري
تصميم الغلاف	:	عبدالقادر فايز
إخراج داخلي	:	عبدالقادر فايز
الطباعة	:	اتيليه تاتش - المحروسة
الناشر	:	الدار للنشر والتوزيع
المدير العام	:	محمد صلاح مراد
تلفون	:	٠١١٢٥٨٠٠٤٦٧
البريد الإلكتروني	:	eddar_press@yahoo.com
فيس بوك	:	www.facebook.com/eldarpublish
رقم الإيداع	:	٢٠١٦/ ٢٣٥٠٦
الترقيم الدولي	:	I.S.B.N.: 978-977-702-166-1

شارع الصابحه

(کردان حكايات)

سرديّة شعريّة

إكرام بشري

الدار
للنشر والتوزيع

٢٠١٦

الإهداء

■ جورج وربیکا.. أطفالی، حتّة الضّل الی فارشه
القلب مجاناً، والنهر الی بیجری جوّه الروح
والتمر الی بیقوّت والعسل الی بیطیب.. دُنیتی
الی باموت فیها وانا عایش

■ ناهد بطرس: الغالیة الی بکتُ کثیر من غیر
دموع وجاهدت کثیر لحد الشهادة وعِشقت
أنفاسی أنا والصغار لحد العبادة وفردت جناحی
لما نویت أظیر وفتحت کل البیان والشبابیک،
وانا راجع تانی للعش ومن غیر غش، أنا باقولک
أنتِ النهار الأبيض الی انا شایلة علشان یحمی
القلب من سواد الأيام .

▪ سعد مرقص (المعروف بسعد الشيطان) واللي في يوم
قتل سيد زرزور البلطجي وخلص الناس من أذاه،
وبعدھا اتحوّل هو برضه لبلطجي، وما قدرتش اكتب
عنهم في الكتاب لأنني خوفت من ذريتهم اللي لسه
عايشة.

▪ سعاد حسني.. وخلي بالك من زوزو.. الحقيقة
والأسطورة.. والحب.. اللي كسرت مفتاحه في باب
القلب.. البرواز والصورة.. زوزو وضحكها وكآبتها..
وطيبتها وقسوتها.. وريحة عرق الغربة في فرشتها.

في يوم عدّى عليه خمسة وعشرين سنة
حطّيت في شنطة سفري بيوت وناس
سكنتهم وسكنوني
وحيطان بيوت حبات وجع
وفرح وجروح
وروح بجناحات
لَقَّتْ تأخذ من ريحتهم
بواقى حياة
وعطر الحنين من عضم التربة
وشلّت في قلبي كلام من طرف لسانهم
كان يبزق في غيوم الغربة
وبواقى عجيب ما اختمرش
وحفنة تراب لطريق ما اكتملش

رمضان علي الأبواب

ظهر الهلال

وشارع الصابحة بيشغي عيال بيعلقوا الزينة

وابتدا دق المسامير وشد الخيطان واللقق والتلوين

السنادي كهربة الفانوس ها نوصلها من بيت برسوم عبد الملك

واعقاد الزينة ها تمشي زقزاق

من اول بيت عم زكريا لوندي

لغاية بيت فايز موسي كيرلس

شارع الصابحة لازم يبقي أحلى من الشوارع اللي حوالينا كلها

أهي عاده وكبرنا عليها

حتي الواحد مش عارف ليه سموه شارع الصابحة

يمكن يجوز علشان كل البنات اللي فيه طازه وصابحة

عم حليم حنا بني فرن الكنافة

وكان مستتي الطينة لما تشد

علشان يرمي فوقها الصنية ويقفل حواليتها

الفرن مبني علي زاوية

نصه مطروح في شارع الصابحة

والنص الثاني في شارع الشهيد ماهر رشدي

المتفرع من شارع الصابحة في ملوي

وعين الحمية مفتوحة عليه
حتي الجمال نزلت عبس الوقيد من علي ضهرها
واتكومت جنب عين الحمية
وقبل ما أنسي عايز اقولكم
إن شارع الشهيد ماهر رشدي
ده له حكاية لوحده
وحكايته قُربيه مش بعيده
كانت ما بين حرب الاستنزاف
وتلاثة وسبعين/ العبور
وفي الاتنين استشهد من الشارع راجلين
كان صاييهم الدور للخدمة ف الجيش
ماهر رشدي توفيلوس في الاستنزاف
واحمد عثمان محمود في العبور
وفي يوم جت البلدية علشان تكرم الشهدا
وتسمي الشارع علي اسم واحد منهم
اكنم يعني الاتنين
كانوا عايشين فيه
جه مندوب البلدية
وجمع العيلتين

وجابوا معاهم أوجاعهم وأحزانهم
واشتياقهم للغائبين
وقال لهم :

محتاجين نسَمِّي الشارع
علي اسم واحد من الاتنين
يعني ها يبقي اسمه مثلا
شارع الشهيد (...)

فَرَّ الحاج عثمان وقطف الكلام قطف وقال:
شارع الشهيد ماهر رشدي تاوفيلوس يا سيدنا الافندي
هو اللي راح الاول ووجعنا ع الآخر
هو اللي شوفناه ف الاول
لما كان رايح حاطط روحه علي كفه
وخلي قلوبنا تدق دق
وهو اللي شوفناه داخل علينا
وحش نايم في صندوقه
واخذ الطلقة في صدره
وخلي قلوبنا تنتشق شق
هو ده الكلام يا سيدنا الافندي
ده اوله وده آخره

الشارع هيبقي اسمه .. شارع الشهيد ماهر رشدي
ومن ساعتها اليافطة اتغيرت من شارع الإسعاف القديمة
لشارع الشهيد ماهر رشدي
ومن ساعتها الشارع بقى معروف باسمه
وبفرن الكنافة اللي ع الناصية
وكل ما يهّل رمضان
يكون عم حلیم حنا خلص الفرن
ويمكن يعمل كنافة النهارده علشان السحور
ده لو جاله عبد العزيز
اللي بيحمي الفرن
مهو شيع له حد ومستتتیه

عبد العزيز كان بيظهر في الشارع
من رمضان لرمضان
وكانت ونيسته في المكان
أوديت حنا
ياه .. أوديت حنا وَعَبَدَ الغزير !
كانت أوديت بتعيش في شارع الشهيد ماهر رشدي
بيقولوا ان أمها رضعتها في ساعة غضب

فشربت عَكَارَةً من بَزَّها الحامي

من ساعتها وهي قعيدة

كان ونيسها الوحيد هو عبد العزيز

كان قعيد زيَّها بالظبط

واللي ببيساعده في الحركة عربية (رولمان بلي)

عبارة عن لوح خشب .. متوصل بأربع عجلات

وكان ببيستعمل إيديه زي المجداف علي الارض

يزيح لورا عشان تتحرك العربية لقدام

كان بيغيب كثير ويظهر من تاني

وفي مرة من مرات ظهوره

أوديت قالت له:

عاش من شافك يا عبد العزيز

عامله ايه الدنيا معاك؟

قالها: والله يا أوديت انا عايش ميت

علشان مش باشوف وشك كل يوم

لكن إذا كان علي الدنيا

فهي بتشيلني وبتحطني

وتقوّمني وتقعدني

وئمّيل فيّ وتعدّني

لكنها عمرها يا بت يا أوديت
ما قدرت تديني ولا عُرزة واحدة في جتتي
تسيبها لي علامة ..
ردت أوديت: بعيد عنك الشر
دي قبل ما تتكُت إبرتها في لحمك تتكُتها في قلبي
وفي يوم من الأيام والكلام رايح وجاي بينهم
حصلت خناقة في الشارع بين عيلة جانيت غبريال وعيلة محمود
حامد

علشان في واحد شاف جانيت ومحمود
ماسكين إيدين بعض وماشيين ورا المعهد الديني
أوديت قالت لعبد العزيز
هُمّه خايفين علي البننت
أصلها بتحبه .. وانت عارف بقى
هي مسيحيه وهو ومسلم
ابتسم عبد العزيز و قال لها:
طيب ما انا وانت كده برضه يا أوديت
قالت له:
لا يا عبد العزيز .. أنا وانت .. عَجَزَة زي بعض يا خويا!

وفي شارع الصابحة كان يعيش مشرقي

فاتح قلبه وعيونه

وبيلعب مع العيال بالزينة

العين رزينة لكن عقله مش واعي

اكن كان عقله متأخر شوية

علشان كده قال: ان قرابيه داسوا علي نصيبه في الميراث

مشرقي كان إنسان بسيط

ملوي كلها تعرفوا

اسمه مشرقي لكن حياته كانت غروب

الحلق ناشف

لكن قلبه بيسقى الناس خرّوب

تعييس وفقير وضعيف

وعارف ان اللي مقويه

انه متونس بصدر الكنيسة

ولما مات أبوه وأمه

ودول اللي كانوا آخر بلة ريق في حياته

من بعدها

وقف متلقّح بالخوف والوحدة

كان النُّطق عنده متعثرٌ

بيتهته يعني

وكانوا كل العيال والشباب

ويمكن حتى الرّجالة الكبار

أول ما يشوفوه يزفوه

ويتريقوا عليه ..

اللي يضربه علي قفاه ..

واللي ينغزه ف جنبه ..

واللي واللي واللي ..

كل ده علشان يضحكوا ..

وما كانواش بياخدوا بالهم من زعاقه ..

اللي كان بيملأ الشارع ..

كان بيخاف منهم

ويجري بعيد ..

كانت قعدته المفضلة جنب باب مطرانية ملوي ..

بيستتي حد يحن عليه ..

من الناس اللي داخله واللي خارجه

من الكنيسة

وكان برضه يحب القعدة علي الرصيف بتاع الجامع العرفاني

كان بيحلم بحق رغيف العيش
أو إن مجّد الله ..

يحن مرة علي اللي قاعدين علي الرصيف ..
كان دايمًا جعان مع إن أمه قبل ما تموت ..
كانت سايبه له فوق سطح البيت ..
صومعة مليانة كِشْك ..

لكن مش قادر الحزين يطلع لها ..
لأن السلم واقع والبيت واخذ إزالة
كانت أوديت بتحن عليه ..

بـ "ضُورة" كشك

أربع كشكات يعني

أو تتفحه ساندوتش محشي كرنب ..
زي ما كانت بتعمل مع عبد العزيز حبيبها ..
بس عبد العزيز كان زيادة شوية
كان ساندوتش المحشي كرنب ..
بتبقي راميه في نصه ..

حِتّة لحمّة

قَصَّتْهَا من مَناب اخوها الكبير ..
اللي بيرجع في الليل ..

بعد ما يخلص شغل في صيدناوى
القصده.. فجأة مات مشرقى ..
وهو قاعد في مكانه المفضل ..
قدام باب المطرانية ..
وانفرد جسمه علي الأرض بطوله
وناس كتير جابت جرايد علشان تغطيه..
لكن معظمهم ..
كانوا يقربوا خطوة..
ويرجعوا خطوتين ..
كانوا خايفين . .
شيء غريب!
مشرقى اللي ميت دلوقت قدامهم ..
هو نفس الشخص اللي كانوا بيتمسخروا عليه ..
من خمس دقائق فاتوا !
يا تري خايفين منه هو ..
وللا من موته؟!
خايفين لأنه أخذ من الموت قوته ..
ولا علشان اللي بعت يستدعيه
هو أعلى سلطة

كانوا خايفين جداً منه ..

علي الرغم من انه في موقف مكانش هايقدر يهرب فيه من رزالتهم

..

او يقاوم سخافاتهم

وبرغم خوفي من المنظر

لكن لاقيت نفسي ..

بأقرب منه ..

وبصيت في وشه

لاقيت ملامحه اتبدلت

أصبحت ملامح راجل معتز بنفسه

وكان الموت .. فرد له طوله وصلب عوده

مش عارف ازاي..

بس قولت لنفسي:

يمكن يجوز علشان اتخلص بموته من روحه الضعيفة

اللي كانت بتخليه يشوف الناس كلها أقوى منه

او يمكن يجوز علشان بموته ..

اتخلص نهائياً من سخافة وردالة البشر

- لا ما ماتش ..

- لا مات قدامنا يا سمس ..
- كان الفيلم باظ يا ابني .. ده البطل !
- والبطل عمره ما بيومت
- طيب عمرك سمعت عن رشدي أباطة ومات؟!!
- يا ابني انت وهو .. مفيش ولا رشدي أباطة بيومت ..
- انتين بس بيفضلوا عايشين علي طول ..
- طول ما انا عايش ..
- مين دول يا سمس !?
- رشدي أباطة وسعاد حسني ..
- يا سلام..! سعاد حسني !?
- ايوه سعاد (زوزو) ..
- كذا مرة المخرج يحاول يخليها تموت ..
- لكنها مش بتعرف تموت..
- يااااااه .. ومش بتعرف تموت ليه!?
- اصلها .. بتعرف .. تعيش .. بس ..
- بس هما بيقولوا انها انتحرت
- وللا باين حد رماها من فوق !..
- اللي انتحر ولا اترمى من فوق
- هو الموت

لكن هي عايشة..

أومال مين اللي بتتام علي دراعي كل يوم؟! ..

ومين اللي أنا كل يوم بأقول لها:

أنا عايش علشان انت عايشة

رغم أن الموت ببيجي كل يوم

ياخد مقاسي ويمشي

تبقى عايشه ولا مش عايشه!؟

طيب شوفت زوزو .. في فيلم شباب امرأة .. هي ورشدي أباطة

..

لما غنت له غنوة بمبي بمبي!؟

- لا يا سمسم بقي شباب امرأة .. بتاع تحيه كاريوكا وشكري

سرحان ..

- اطمس علي عينك .. انت شوفت شباب امرأة!؟

- ايوه شوفته ..

- طيب عشته!؟

- لا ما عشتهوش ..

- يبقي ما شوفتوش ..

- طيب احكيه لنا يا سمس

- بكره .. بكره لما دمي يروق ..

وقلبي يَكِنّ و رِيقِي يَطْرَى
واطمئن على مشرقي
قوم ..

قوم يا مشرقي ما فيش حد ف شارع الصابحة .. بيموت ..
وعدى من جنب الجرانين ومشي

سمسم ابو صالح .. كان يشتغل طول الأسبوع في الدوكو ..
دوكو السيارات
كانت الكلمه الوحيدة..
اللي بيقولها باللغة العربية "السيارات!"
كان يقبض كل يوم سبت ..
والحد يقوم طالع علي السима ..
هناك .. كانت سينما ملوي بالاس
كانت صيفي ..
نقعد في شباك بيت عمي ..
كان باصص علي الصالة
والشاشه قصادنا بالمللي ..
ولما النور ينور في الاستراحة..

كنا نشوف سمس قاعد قدام في الترسو ..
واحنا فوق في الشباك ..
واهو كل واحد علي قد قِرْشُه
ولما سعاد كانت بتبان ..
كان خِيرها بيَعُم علي الكل ..
اللي تحت شايف وبرضه اللي فوق ..
بس سمس .. كان يسرق منها نظرة لتحت ..
ويسرق كمان نظرة لفوق
كانت عينيه متجيش في عنينا أبدأ
من باب الاحترام والذوق
كان خُلْقه بيضيق من كتر الخلايق .. اللي ببصوا لها
كان يكْمَل اللي ناقص من فستانها بعينه ..
كان فيه عشرة غيره بيَقْصولها
وما كانش عنده غير جملتين ..
القلب يعشوق وللا العين ..
وخلي بالك من زوزو ..
وخلي بالك من زوزو ..
حتي لو طالع من فيلم .. بطوله ميرفت أمين ..
كان بييجي في الصابحة يقعد في لمتنا ..

لا سلام ولا كلام ..
يبدأ يحكي في فيلم عشية
بس بأبطال جداد .. وحدوة جديدة
ونسوان علي مزاجه هو ..
حتى اللي بيعجز البطل عن عميله .. بيكمله له هو ..
خمستاشر سنه بتفرجنا يا سمس يا صالح ..
علي أفلام من خيالك ..
ما فيهاش ولا فيلم ..
ما فيهوش سعاد حسني ورشدي أباطة
وما فيش ولا مرة نسي فيها يفكرنا
ان سعاد .. أجمل ميتين مرة من "فيولا"

فيولا دي واحدة ست جميلة ..
عايشة برضه في شارع الصابحة ..
بالظبط في حارة متفرعة منه .. اسمها ام المؤمنين
وجوزها مكسيموس .. سريح غلبان
مرة بسلك المواعين
ومرة يلف يبيع دانتيلا فساتين البنات

فيولا زي العامود الرخام
اللي لِسّه مفيش إزميل نحات جَرّفُه
كانت الخمسة جنيه وقتها .. مبلغ مش كبير
وبرضه مبلغ مش صغير
لكنها كانت في متناول مواطن عادي ..
كل طموحه انه يمرغ وشّه .. في جسمها القטיפه
ولما تخبّط على بابها المفتوح
تدخل تلاقىها نايمة عريانة
ولما سألها واحد م الرجالة
انت ليه عريانة؟!
جاوبت:
انا مش عريانة .. انت اللي ها تتعرّى!
قال لها:
عمرك ما حسيّتي أنك عريانة؟!
قالت له :
لا .. بحس
لما بغسل جسمي في الحمام ..
كانت عيون الرّجالة السُّخنة وقتها
بتقطّط علي جسمها

ست ايام في الأسبوع ..
وكانت ترتاح في اليوم السابع
كان يوم الحد بالنسبة ليها .. هو يوم الرب ..
وكان هو اليوم الوحيد برضه ..
اللي بيُرجع فيه مكسيموس جوزها .. للحياة
سمس عينية عدسات نافدين علي الشارع ..
وكان رفيع .. ولا كان قصير ولا كان فارغ ..
كان عادي .. تقدر تقول كان باهت
ما كانش عنده حقايق كتير ..
كان كله كلام أحلام ..
وكان يختفي كتير
وما كانش يبقى زاهي ..
غير وهو بيحكيلنا في الأفلام
وما كانش يحب يعدّي من ناحية فرن حلیم حنا ..
لانه ساعتها بيبقى مجبر ..
يعدّي من قدام دكان .. مجاهد السنّان
وسبحان الله .. لا مجاهد كان يطيقه ..
ولا كان هو يطيق مجاهد ..
عم مجاهد بيسن السكاكين والمقصات ..

دكانته مدفونة في آخر الحارة
والحجر الداير سنارة
بيصطاد الرزق العاصي ..
كان فارد طوله ..
كان صدره الواسع محشود بحاجات ..
ذكريات وبنات وغربه وحنين
وكمان دخان
كان بيدفن كل يوم فيه علبتين ..
وقلبه كان دافع مقدماً فواتير عشق كثير
وعينيه مسنونة وحنونة ..
وساعات بتكُب شرار ..
ويتشغي بدموع الهم ..
بس اما بترمي النظرة ..
علي البنت "حنان"
بتاخذ منها عينة الدم ..
كان يمضغ يومه بطوله ..
ويحننه ويقسيه
وكفيتها عَ الحجر الداير بتقلب شوقه وتصحيه
كان عارف ان الدنيا نعاجة وعنديّة ..

بس بلقمة فقيرة..
بيقطع عرق الجوع ..
ويسيّح دمه..
كانت ضحكة قلبه..
زغروته تخضر فدان..
وقلة حيلته مليانة ندالة
كانت لحظة صمته مليانة قِوَالِه ...
والبنت حنان ..
خطوتها بتدوس تفاصيل الحارة
وبتاكل في قلوب وعيون
ومجاهد بيجز
ويدوس بجنون في البدّالة
وحنان تقرد خطوتها ..
تترج الأرض من تحتها
وكل ما تغيب و تعدي
بتموت فيه وبتحييه ..
ومجاهد بيكّور جسمه الناحل في ركن الدكان ..
وحنان زي الشهد .. في خياله
كان نِفْسُه يَدُوقُه ولو مرة

مجاهد كانت عتمة ليله بتخييه ..
ويروح فارد جرحه فـ كفه ..
ويسن سلاحه بالمرّة.
وكل نهار بيشقشق في الشارع
يجر أوديت من عند العتبة لـ برّه
كانت ترمي الصباحات ..
عَ الرياح والجاي ..
كانت ناس من كسر الضلّمة بتسعى
وهي بتغيب وتاخذ شفطة
من كوباية الشاي اللي في إيدها
غلبانة.. ما كانتش تحب الليل
ودخوله عليها ..
كانت وحديها بتقضيه
وتحكي لعبد العزيز وتقول له:
أمي كانت تنام من بعد أذان العشا
تاخذ دواها وتخش في فرشتها..
وما بتتساش .. تاخذ أحزانها وأوجاعها ..
تنام جنبها ..
واديني .. بفضل كده ..

زي ما انا يا عبد العزيز
ليل بيحبيب نهار..
ونهار بيحبيب ليل ..
ولا حد داري بي ..
زي النخلة اللي بتتباهى بشواشيها..
وأقضي طول الليل ..
أملًا كفوفي أحزان .. وأطم بيها
عارف يا عبد العزيز ..
وحياة من جري دماك في عروقي
وخلي قلبي يتشعلق بيك
لما كنت اقعد مع أمي ..
وافتكر كلامنا مع بعض
وأجي اضحك .. قوم وسطي الفوقاني يتقصع لورا
كانت حَلْمَة سدري بتتفر قُدام ..
كانت أمي تقول لي:
أتلمي يا بت..
وضمّي دراعاتك علي سدرك..
اخنقي البزين النافرين دول
اخنقيهم

أمي يا عبد العزيز ..
من ساعة ما رضعنتي نكدها وعجّزنتي
زي ما تكون مش عايزه تسبب أي حاجه حيّة فيّ
تُطرف عين الناس .
حتي أخويا يبجي ويروح
ولا كأنه شايفني
كل مرة يخطي من فوقيّ في الرُّوحة والجايّة
وكأنني مش موجودة
وان جه مرة قال لي : مسا أو صباح الخير
يبقي علشان ينبهني
واشيل رجلي المتخدّرة من قدّامه
عارف ليه كنت بأحب أبويا
أكثر من أي حد في الدنيا
مش علشان كان بيحبني
ما هو أي أب بيحب عياله
لكن أبويا كان هو الحضن الوحيد
اللي بيميل لغاية عندي
علشان يحضني
كثير اتمنيت يا عبد العزيز

ودعيت إني أقدر أمشي
علشان اروح آخذ حسك
حتى لو ها تطولني فضيحة جميلة وصاحبها فيولا
ولو ها ياخذ ابني وجوزي زي ام سامي
مال عبد العزيز عليها علشان يوشوشها
وهي مالت عليه برضه
راح قال لها:
ما تتعيبش نفسك يا أوديت
أصل أبو قُبّة زرقا
لما بيعمل حاجة غلط
مش بيعرف يصلحها تاني
ولو كان لنا قُومَة
كان بان
لكن شكلها مش باين
الظاهر إني انا وانت
ها فضل باركين علي جرحنا علي طول
ولو الدنيا اتقلعت و طارت من حوالينا
ها نفضّل انا وانت
باركين في مكانا

حتي لو نبتت لنا جناحات

كانت أوديت تحكي لعبد العزيز
علي اللي حصل طول السنة في غيابه..
حاجة غريبة!

وكأنه ما غابش ولا دقيقة

كانت شايقة ولا مسة

وحاسة كل حكاوي الناس

وبتسمع بعنيها

كأنها زي المغناطيس

وهو بيشفط البرادة

كانت صادقة في كل حكاويها اللي شافتها علي الناس

إلا اما كانت تحكي علي ابوها

من كتر حبها فيه كانت كذابه

كانت تحكي عنه لعبد العزيز وتقول له:

ابويا كان طول بعرض ابيض بحمار

كل النسوان في الشارع تتشاه

وعليه رسمة جلابية

ولا فيه راجل يضاويه

عبد العزيز راح ضارب عينه من الشباك الطال عَ الشارع
كان فيه صورة معلقة لابوها..

علي حيطَة متبيضة بالجير
ومن كُتر ما ابوها كان ناحل وضعيف

الصورة متعلقة بفتلة رفيعة

في مسمار شيشه صغير

وَعَبَدَ العزيز غمغم بكلام :

والااه يا اوديت يا غاليه

ابوكي و بتحبيه بجد

أوممال !

بتقولي عليه طول بعرض

وانا سامع صوت كحة صدره من هنا

من كتر ما شم غُبار قطن الحلاجة

حسّت اوديت بنظرة عبد العزيز للصورة

وخافت علي ابوها لا تتغير في عينين عبد العزيز صورته

قالت له دي صورة اتصورها كان لِسّه راجع من ليبيا ..

وكان تعبان كان عنده حصوة في جنبه ..

ودي صورة التعيين ..

صوّرها له المدغون في قلبه محمد الشافعي اللي قصادنا من
ناحية البندر ..

وشاورت بيدها عليه

لحظة ما كانت عدسة الكاميرا بتاعة عمّ محمد الشافعي..

بتتش علي وش راجل قاعد مبتسم ..

والابتسامة شكلها هي و وشّه متعرّفين علي بعض جديد..

كانت عيون محمد الشافعي وراسه مدفونين جوّه القماشة السودا ورا
العدسة

بُتحاول تشف الابتسامة قبل ما تتلم من علي وشّ الراجل..

لحظة ما يستدعي حبة همّ من الذاكرة

اكن الراجل من ساعة ما رجليه عرفت كيف تسرح ع الغيط ..

وهو بيغرس وبيسقي وبيحصد ..

لحد ما بقي ساقط قيد

حتي مراته اتجوزها بكلمة مش بعقود

ودي اول صورة في عمره ..

الحكومة ها تلقها علي كرتونة

تثبت له انه موجود علي قيدك يا حياة

محمد الشافعي ما يهْمُوش غير النص فوقاني..

أصل الصورة مستعجلة..

محمد الشافعي كان قاطع حتة من الرصيف..

فُدَّام عمارة المقدس فانوس ..

جنب البوسطة القديمة

وجنب منه شجره متعلق عليها جاكث بدلة وكرافته ..

لو حد يعني جاي مش مستعد للتصوير

كان هو الوحيد اللي عنده كاميرا بتصور في الحال

(كاميرة مايه)

بس وشه كان ناشف خالص

الشارع كله ناس راичه وجايه ..

بيصوا علي الراجل اللي قاعد مفرود زي الوتر

يمكن بيحسدوه علي لحظة هيتحقق فيها ..

علي ورقة مطبوعة.. ها ياخذها قُرَيْب لما محمد الشافعي يبدأ

العدّ:

واحد.. اتنين..

بصوابعه المرفوعه لفقو بعلامة النصر!

الصورة كاملة ومش مبتورة..

بس كان باين.. جرح نازرُ في عيونه البسيطة..

والوشّ محفور بخطوط الغيطان ..

والشمس سايبه لسعتها علي الجبين..
مبروك .. قالها محمد الشافعي ..
خلاص قوم حط الجاكت علي فرع الشجرة ..
واستنتي الصورة
معلّش الصورة عايزه شوية رتوش
عايز ألم القَتَايِح اللي في الجبين وامسح بالقلم الأسود..
دمعة في عيونك .. رغرغت منك
الراجل ساقط القيد ..
خلع الجاكت وناول له لمراته..
تعلقه له علي الشجرة
ومحمد الشافعي طوح الصورة في الهوا..
كام مرة علشان ينشفها..
وهو بيناول الراجل الصورة
راحت مراته خطفتها وباستها..
ودسّتها تحت الشال..
أصل الشارع كان مليون عَفارة وُعُبار
وعيون كمان ممكن تفلق الحجر..

في شارع الصابحة..

الليل مش ستار
الليل دايماً كاشف فضّاح
والنغجة المهموسة فيه
تسري زي الجن ..
تطير وتلف علي كل البيوت
وتدق علي الشبايبك ..
لجل الودان تسمعها
واللي نايم وسمعه تقيل
مع طلوع النهار من جنب الحيطان يجمعها
كلام الليل في شارع الصابحة مش مدهون بزيدة ..
علشان يطّلع عليه النهار يسيح
كلام الليل في شارع الصابحة تقيل ومتجمّد ..
وف ليله كان راجع فلورانس البنّا سكران
وزي العادة مسلّط علي عربية محمود بتاع البطاطا ..
كان دايماً يجيبه معاه كالعادة ..
بعد ما يُجْبُر ليلته بيّاعه
ويسيبه علي عتبة بيته ويمشي
فلورانس اتمدد علي العتبه وما نامشي
وودانه سمعت جرّ كلام ..

من الشباك اللي في جنبه

كان بين ام حسام وجوزها فاروق العجلاتي..

وبايه فاروق كان عاشق ومؤلف مع واحدة في حِتَّة

كان قاصص من حق ام حسام حِتَّة

ام حسام كانت بتناغش فيه

كانت عايزه تصحي الحتة النايمة

وقالت له:

يا فاروق انا رَوِّقت البيت وطبختلك وكَوَّبتلك حتي الجلابية

قال لها: تسلم إيدك

قالت له: تسلم وتعيش بس يا ريت تراضيني النهارده

قالها : يراضي الكل ربنا يا بنت الناس

قالت له : استغفر الله العظيم يا راجل!

ده كلام تقوله هو ربنا بتاع كده برضه !؟

راح فاروق ساحب نَفْس من الجوزة

وكتمه وبعدين بَحْه

وقال لها:

لا يا ام حسام عدَّاك العيب

ربنا مش بتاع كده

ولا انا برضه بتاع كده يا ام حسام وْحُشي نامي

وفلورانس راح يحكيها في قعداته ..
وكان دائماً يبدأها بجملة وحيدة يقول :
هاحكيكم حكاية علي ام حسام أصل المرآ دي تغيط ..
مش لما تعوز يبقي تعوز بسكات !?
لا.. لازم تبتدي في الأول بوعيط !

شارع الصابحة مستتي رمضان يبدأ
عمّ حليم حنا واقف علي الفرن
وجنب منه الماجور وعجينه الكنافة جاهزة
الكوز في إيده جاهز علي الرش
أول ما تبدأ الخيوط تسيل علي الصاجة
العيال هاتهيص بس لسه عبد العزيز ماجاش
اتأخر كثير السنة دي..
رمضان بانك بشايره وهو لسه مش باين..
أوديت قاعده قلبها مشغوف ..
وفيه حاجة في قلبها مش قاعده ..
عصبت الإشارب علي رأسها وقالت:
هو لسه ما جاش يا حليم !?
قال لها: لسه يا أوديت

وهو بيخلص إجابة علي السؤال
دخل محمد سواق عربية الطاحونة
قال له حلیم حنا:

ما شوفنتش عبد العزيز يا محمد!؟

قال له: عبد العزيز العاجز

قال له: ايوه.. ماله؟

رد بأسى : يا عم حلیم العمر الطویل لیک.. عبد العزيز تعيش
انت..

لاقیناه ساند ضهره علي الحیطة الشرقية من الطاحونة
وقاعد علي العربية الكسّاحة أم الرومان بلي بتاعته وسر الله نغد
اتوهل حلیم حنا وتاااااااااه
وفلتت صوابعه من سدّة أخرام الكوز
وسال منه العجین عَ الأرض..

واتعدّل وقال لأودیت: عبد العزيز مات يا أودیت..

رقص نُصها الفوقاني رقصة المدبوح

وزي ما تكون ها تقوم علي حیلها من عجزها

ولما جت تصرخ.. صوتها اتحاش

وفضالت تدق بإیدیها علي قلبها

وتقول بصوت واطي وتكفر وتتوب

وتعد الذنوب علي صوابها:

وااه يا عبد العزيز يعني كده تسيبني وحدانية في نص الدنيا؟!!

دانت الشارع والبيت والسكن..

تسيب قلبي يتشوي في القدّاحة

ليه يا عبد العزيز تسيب راسي عريانة تنفح فيها القيّالة؟!!

ليه يا عبد العزيز دانت حتة الضلّة الوحيدة اللي قدرت أكنسها من

تحت الشمس..

قرب محمد من أوديت

وطبّط علي كتفها

وضم جلابيته من النص بين رجليه

وراح قاعد في جارها وقال:

اسمعي يا أوديت لما أقول لك:

البنّي آدم مننا نفّس داخل ونفّس طالع..

وان طالت ولا قصّرت كلنا رايح

ويمكن تتلاقي معاه في المنتهي

واللي كانوا بيعتّبوا عليكم فيه في الأرض

يمكن ما يبقالوش عتاب فوق

شديّ حيلك ويصبرك العزيز..

وراح قام ومشى رَوّح علي بيت الخواجة مسعود كالعادة

ونام على ذمة صباح رباح

ويوم شقا جديد

يسيل فيه عرق جبينه

على لقمة ناشفة يطربها

لكن الصبح جه

ولقينا مكرفون الجامع بيقول:

سبحان الحي الذي لا يموت ، توفي الي رحمة الله الأسطى محمد

سواق عربية طاحونة الخواجه مسعود ، وخروج الجنازه عقب صلاة

الظهر والعزاء بالمسجد المجيدي

اتغسل واتكفن محمد في بيت الخواجة مسعود وطلعت الحسنية من

البيت علي الجامع

المسلمين خلعوا النعال ودخلوا يحضروا الصلاة في الجامع

وعلي الرصيف كانوا المسيحيين محشودين

مفيش ولا بيت فيكي يا ملوي اتهزّ قمح في عُرباله مطلعش وراك

مات محمد وخد خير كثير وياه

عَم محمد النوبي اللي شاله التهجير

من خلف السد لحد كفوف الراحة في ملوي

وصبَحْ يشبه ناسها

كان بيسوق العربية الكارو بتاعة طاحونة الخواجة مسعود

كان دائماً يقول:

أنا ليّ في كل بيت في ملوي حته ضلّ، ورغيف سخن ، وصحن

خضار، ومنااب مِثْشال ليّ

كانت كل البيوت بتعرفه

حتي لما كان بيضنيه التعب من اللف طول النهار

كان بيجرّ أي حيطه من حيطانها ورا ضمّه ويتركن ويرتاح

دفنوه الرجاله وكرموه آخر كرم وخلصوا وراجعين..

وام رحيم لسه بتشهلق بين الحين والحين..

ودي كانت المرّة الوحيدة

ان واحدة ست تحضر دفنة راجل

ساندها حلیم حنا من دراع وأخوه منير من الدراع الثاني..

حلیم كان حنون وصادق

وكل حاجه فيه واخدها من طباع الأرض

حتي طوله كان فارع

كأنه نبتة وكانت بتتسقي من زمان

كان إنسان وراجل

كان بيروح لبييا ويرجع جايب الخير لكل

لأولاده وولاد أخوه منير

كان فاتح معاه دكان البقالة شركة

وقت ما حلیم یروح علی لیبیا
التانی منیر کان یرعاه
کان بینہ و بین الناس محبات و تحیات ..
غیر أخوه منیر خالص
کان جِہمٌ و کثیرٌ وما یضحکشی للریغیف السخن!
والنَّاسُ کانت تعدي علیہ قد ما یعدوا
و کأنهم بیدوسوا علی حنَّهٌ ضل..
کان یقعد فی الدکان طول الیوم یببع فی سجاير فرط
وامشاط کبریت وشاي وسکر و سمن و زیت و زیتون و جنبه ضانی
وحلاوة شعر
و کمان کان عنده التموین
یبداً فی توزیعه أول کل شهر ..
کان یفرد دفتر ملیان صفحات
کان نظره ضعيف
ومسجل أسماء الناس بخط کبیر
علی سطر وسایب سطر ..
کان عادي لما تسمع کل یوم واحده بتقول:
یا منیر یا ضلالي لیک یوم ..
وللحق کانت ذمته یجری فیها القطر ..

كان دائماً يقول (مجاناً أخذتم مجاناً أعطوا)
وماكانش يدِّي حاجة بالمجان
غير القربانة اللي بياخذها من الكنيسة كل يوم حد ..
كان وهو راجع كان يفزق منها علي الكل
وكانت دائماً تبقي راجعة معاه فيولا مرات مكسيموس في نفس
الطريق..
وكان من اصحاب النصيب في توزيع القربانة الست حكمت

ايوه الست حكمت جاد السيد
كانت ساكنة في بيت طويل عريض
ورثت فيه الدور الأرضي
وبيارة في نص الصالة بتطفح كل ما حد في الأدوار اللي فوقها
يرشرش وشه بشوية مايه..
كانت تقضي نص نهارها تكسح مِ البيارة وتكبّ في قلب الشارع..
وتقضي النص الثاني من اليوم تدعك ركايبها بالزيت الدافي ..
وتاكل آخر اليوم لقمة وتصلي صلاة قبل النوم
وتطلع كام بسطة من سلم قدام سريرها العتيق ابو عمدان وتنام ..
طول عمرها ما دخل بيتها راجل

كل اللي بيخطوا عتبتها أطفال يشربوا مايه من الزير
أو ياخدوا نفسهم من اللعب في القيّالة (فين جوزك يا خالة
حكمت؟!) .. سألوها في مرّة الأطفال
قالت: جوزي المسيح .. أيوه انا متجوزة المسيح
(طيب مش بنشوفه ببيجي هنا يعني) سألوها الأطفال؟!
قالت: لا عايش معايا من ساعة قلبي ما دخل الدير
ومن ساعة ما بقت الوحدة عاضّة في ضهري..
يلا يا عيال العبوا
خلوني أقوم ألمّ الطفح بتاع البيارة..
وهي طالعة بسطل المايه في طلعة أم سامي من بيتها..
يعافيك يا حكمت .. ازيك يا غالية
ردّت: حلوة يا حبيتي .. يسلم عمرك
يقصّر مني ويمدلك انت وبناتك واجوازهم ويعزيكي ..
انا يا حبيتي الدنيا بتفكّ فيا تعريفات وقروش عمرها ما سابنتي
جنيه صحيح علي بعضه..
بس برضه حلوه..
ولما بتغيب علينا شوية بترجع تراضينا..
وهو برضه حلو مش بيبخل علينا ..
بس احنا اللي فاكرينه مش كده

بس احنا نجرّب حنانه ومحبتة
جرّيه يا حبيبتي..
قالت لها: جرّيته
وفوّتّك بالعافية يا حكمت .

ام سامي الدنيا دابحاهها وقسمت قلبها نصين..
والنّاس لما يحبوا يوصفوا الحزن بيوصفوه بيها..
من ساعة ما خرج جوزها زمان كالعادة بعد الفطار معاها
وولادهم..
ثلاث بنات وولد عليهم
ودول كانوا رجّاه من الدنيا هو وام سامي
يروح لدكان بيع للقماش المانيفاتورة في السوق الكبير..
وكان كل يوم يرجع ساعة الغدا ويريّح ساعة
ويرجع يكمل لغاية الليل..
لكن النهارده طال انتظارها انه يرجع
وما جاش واتمسي وصبح عليها يبجي كام مسا وصباح
والقلب بقي متشعوط
وروحها بتطلع وبترجع يبجي ثلاثين مرة في اليوم

وكل ما تبص للتلات بنات والولد الحيلة..
تَنْقُل علي قلبها حيلتها القليلة وتقع مكانها في الأرض..
والنَّاس تشيل وتطبطب وتقوق
وهي المسكينة ما خلتش ولا مكان العين ما بصتتش فيه
ولا حِتَّة اللسان ماسألش عليه فيها
كتير عدي!
خمس سنين قول بالتمام والكمال
والحكومة كَفَّت بحث عنه
وعلي حسب القانون اعتبروه ميت
وظلعوا لها معاش علشان كان مواظب علي دفع التأمينات
الله يرحمه
وللَّا يساعده ان كان حي ..
قفلت ام سامي بابها عليها وعلي عيالها
وكَفَّت نفسها بالمعاش
وباللي كان بيطلع لها من البيت اللي هُمَّه فيه..
كانوا مأجَّرين أربع شقق لاربع عائلات..
وفضلت يومياتي الحزينة تحقن عيالها حنان ومحبة وطولة بال
لغايه لما اتخرَّجوا كلهم من الجامعة
وهي كبرت

وبرضه سامي ابنها كِبْرُ
وبقي كتفه يطول يدخل تحت باطها من غير ما يشب ..
بقي سندها وعنيها اللي بتروح وتيجي في الشوارع
وقلبها اللي بيدق وبّلة الريق ..
وجاله التعيين مدرس في الارياف
يركب كل يوم مواصلات ويداوم ..
وأخواته البنات جالهم عرسان
واحدة ورا الثانية وبقي عندها ثلاث رجاله
اخوات لسامي وزى ولادها ..
بدأت ام سامي تاخذ نفسها وقلبها دقاته تهدي
وبقيت بتقدر تاخذ شفته من كوابية الشاي وتستطعمها ..
بقي طعم الحاجة يقعد علي لسانها ..
لكن تقول ايه في الدنيا أصلها دُنْيا
فُصِرَ الكلام
خرج سامي الصبح كالعادة وما رجعش في معاده ..
بدأت الست والبنات واجوازههم والجيران يدوروا عليه
ويتصلوا بالمدرسة اللي بيشتغل فيها في الارياف
وقالوا لهم: ماجاشي النهارده
وام سامي كل ساعة تعدّي

وولدها مافيش أي خبر عنه
تاكل من نظرها جتّة
ومن روحها جتّة
ومن جنتها جتّة..
وفضلت الأيام تشد في بعضيها
لغاية لما عدي خمس ايام
وام سامي تقول:
راح زي ابوه ما راح
سابنا ومشي وخذ روحنا وعمرنا معاه ..
وهي قاعدة تعدد قبل معاد العديد
جه عسكري من البندر وقال لهم:
احنا لاقينا ولدكم كانت جتته عايمة في ترعة الديروبية
بعد ما غرقت العربية اللي كانوا رايعين بيها الشغل
البقية في حياتكم
صرخت ام سامي صرخة ورا التانيه
شقت سكون الليل اللي كان ميزة الشارع
بعدها انتورت الحيطان
انصاص بني آدمين مدلدلة من الشبابيك
علشان يعرفوا فيه ايه!؟

وام سامي طلعت في بلكونة بيتها
وقفت

وكانها بترقص علي حفنة جمر
ورفعت صُباعها ل فوق

بتحدّر مرة وبتعاتب مرة

وبتصرخ مرة في القبة الزرقا

ورجعت تعدّ علي صوابها وتقول:

العشور وبادفعلك من عوزي واحتياجي

مِرْواح الكنيسة كل يوم حدّ

وما غيببتش عن بيتك مرة واحدة..

الصيامات كلها صمتها لك

الصيام الكبير، والصغير

وصيام الرسل والعذراء مريم..

أنا عمري ما بخلت عليك ولا مرة واحدة..

انت ليه بقي بخلت عليا ببلة الريق الوحيدة اللي بترطب جوفي ؟!

مكننتش خليته يُلعص في بطني من الأول!

ما كنتش خليت وشه اتطبع علي صدري وهو أما يرضع !

كنت خدته صغير قبل نفسي ما يتشعلق في نفسه

ما دام في نيتك قساوة

ايوه كنت خدته صغير قبل طولہ ما يتفرد
وحسّه يملّي البيت ونس
ايوه يا ناس كان خدّه صغير
قبل انا واخواته البنات ما نداري في ضله
آآآآآ (وهي رافعة صُباعها في عين السما):
حنيّة إيه دي اللي بيقولوها عنك!
يا بوووي عليك وعلي قساوتك !
وفضّلتُ تصرخ وتصرخ في الفضاء
وتطوّح إيديها دواير في الهوا
وكأنها بتلقط طرف خيط علي يدها
علشان توصل في النهاية للصيد
وتجبره علي النزول علشان يكون الكلام معاها كيل بكيل
يمكن يخجل من منظرها
ومن وجعها ويرجع اللي خده
الناس واقفة في الشارع ومش عارفين يقولوا ايه !
البقية في حياتك..
وبعد الغالي هو بقى فيها بقيه؟!
العمر الطويل ليكي..
وتقعّد ويطول عمرها تتعذب!

مفيش كلام بس اللي طالع علي الناس

بس يا ام سامي..

حرام ما تكفريش حرام ..

وام سامي تصرخ وتقول:

من اليوم وطالع مش ها اخطي عتبه بيتك مرة تاني

ويحرم علي لساني دواقة الحلو ..

ومن النهارده وطالع

مش ها تلمس جنتي الميه غير في الغُسل بتاعي

ولا ها ترتاح علي فرشاه طرية لحد دخلتها التربة ..

وراحت فارده كفها في وشّ السما

وبتودّي وشها الناحية الثانية

كأنها بتوقف التعامل بينها وبينه..

ولما صرخت

رجّت الشارع وقالت له:

من النهارده وطالع مالکش صالح بيّ

وانا برضه مش عايزه منك حاجة

حتي الأكل والشرب نفسي عافتهم

الناس في الشارع غمغت

وواحد يقول:

استغفر الله العظيم

وحد ثاني يقول لها:

حرام عليكى ده كُفْر!

وصوت الناس ابتدا يعَلَى

وما سكتهمش غير صوت ام محمد شرقاوي

التانيه مسكينة اتجريت في وحيدها وسندها

اتاخذ منها في في شوية سخونة ببيجوا لعيل صغير ابن ست

شهور ويروحوا منه

لكن ابنها يا دوب ما كملش نص نهار وكان راح!

ام ومحمد شرقاوي كانت محروقة

راحت صرخت في الناس وقالت لهم:

سيبوها في وجيعتها وخلوها تقف له بقي المرّ دي

أصل تارنا معاه كِبِرُ وبقي مالهوش طعم

أصله مش بياخذ غير الغاليين وسايب الرخاص

خلي عقلنا خلاص ها يطقّ!

يا عالم يا مؤمنين

ده كل مرة إيده تتمد فيها علي بيت

مش بياخذ منه غير الجمل اللي فيه!

ويزرع صبار الحُزْن والوجيعه والمرار والحُنْضَل في الحلق

ومن يومئذ وام سامي لا بتاكل حلو ولا بتتام علي سرير
ولا جنتها بتلمسها الميّه
وبتغير هدومها علي الناشف
لكن عُمر ريحة جسمها ما فاحت أبداً .

وفضيلٌ بعديها
شارع الصابحة ساكت وهادي وكافي خيره شره
لغاية لما المسلمين والمسيحيين شالوا من بعض
ووقفوا وبينهم الشر نافر
علشان جميلة ام محمود
اللي كانت كاشفه نفسها بالخمسة جنيه
طقت في دماغها
ما يدخلش معاها في ضلمة بيتها مسيحيين ثاني..
ولما المسيحيين الشبان عرفوا
راحوا على "فيولا" وقالوا لها:
ما فيش مسلمين يدخلوا عندك ثاني..
ومنعوا ناس بالقوة
قالت:

خلاص.. إذا كانت جميلة قالت كده يبقي انا أرخص للمسيحيين
وأغلي ع المسلمين!

ما انتو عارفين زيايني المسلمين كتار ..

وراحت جزى علي جميلة.. تعقلها

علشان خافت من الفضيحة والريحة توصل للمباحث ..

قالت لها: جراك ايه يا جميلة هو خلاص الإيمان نزل عليكى..

مالك؟! ده اللي واصلك واصلني..

من امتي وفيه مسلم ومسيحي؟

هي اللي زيننا وقبلت انها تتعري

ببيقي ليها الحق في النقاوة علشان تقولي مش ها ادخل مع اي

واحد مسيحي؟!

وكمان مش ناقصه نجاسة؟!

طيب اهو الرجالة وقعوا في بعض قدام بيتي

ومفيش واحد مسلم قادر يخطي عندي..

ينفع كده يا ام محمود لما المسيحيين والمسلمين يقتلوا بعض

علشاننا؟!

(جميله ام محمود ساكته وبتسمع وزى اللي مش عارفة نفسها

غلطانة ولا صح .. و مش ساكته)

اسمعي يا جميلة انا عارفة انك اتغيرتي من ساعة العيال السُّنِّيَّة
اللي بجلايب بيضا ودقون ما جولك اكر من مرة علشان
ينصحوكي بالحلال والحرام .

واوعي تقولي لا ما حدّش جالي!

انا عارفاهم.. الواد ابن صباح بتاع البقدونس والجرجير
والواد ابن مديحه الخبازة والواد الطويل الجهم ابن أنعام اللي كانت
معانا زمان

اللي مسكوها مع الحاج ناجح الوحش..

وعارفه كمان يا جميلة انهم لما دخلوا عندك في الليل

بعد جوزك ما طلع علي وردية الحلاجة

علشان يقولوا لك ده حلال وده حرام

كلهم ما طلغوش من عندك زي ما دخلوا..

اللي زينا يا حبيبي مش بتحس ولا بتفتكر

ولا بتعرف تفرّق لحم عن لحم ..

الحاجة الوحيدة اللي بنحس بيها وبنعرف طعمها ولمستها

هي الخمسة جنيه اللي بيحطوها تحت المخدة

او بنقبضها في الاول لما يكون واحد مش مضمون .

وانقطع الكلام بينهم لما فات بديع
كان طالع من بيت السيد عبد المنعم اللي بيشتغل عنده
كان بيته في النص ما بين قصر السفير
وبين بيت موسي كيرلس وبيت برسوم عبد الملك ..
بديع جه البيت صغير واترّى فيه
الشارع كله بيعرفوا واحد واحد ..
بديع بيعتبر كل الناس ناسه
وكل الرّجالة أعمامه
وكل الستات هوانم
كانت لِسّه خانة الدين عند بديع فاضية..
وعاش عمره كله وهي فاضية..
مرة يقول سيدي عبد المنعم قريبي..
ومرة يقول جابوني من البلد..
كان من بلد غرب ملوي اسمها (قُلْبًا) سبعة كيلو متر
بعيد عن مكان ما بديع عايش بيخدم في بيت سيدهُ عبد المنعم
ولكن كانت قريبة من قلبه زي حرقه الشمس
وهي صالبة عودها في بؤونة..
كان يغيب ويشيل علي راسه بلاص عسل اسود
ويمسك في إيده صفيحه جبنة بيضا

ويطلع من الصبح بدري
ياخذها مشي من ملوي لغاية قُلبًا
علشان يزور أهله..
كان بيكون فرحان ويقول لكل اللي يقابله:
انا رايح أزور أهلي ..
سيدي عبد المنعم محمّلي الخير كله علشان أودّيه لهم.
وعيال الشارع بيحاولوا يخطفوا الطاقية من علي راسه
كان يقولهم:
ها اجيبلكم سيدي عبد المنعم
ها توقعوا بلاص العسل..
حوش العيال عني يا خوجة زكريا..
حوش عني يا خوجة بشري..
تخاف الأطفال وتجري وتسيبه في حاله..
يتلقاه عم احمد الحلاق ويسأله:
رايح فين يا بديع؟
فيجاوب بفرحة غريبة:
رايح البلد أصل النهارده الشوار بتاعي علشان ها اتجوز
يقول له: امتي يا بديع
يقول له الخميس ده عدّيه ..والخميس اللي بعده عدّيه برضه

الخميس اللي من وراهم بقي ها يكون كتب كتاب ودُخْلة
بديع عمره ما ملكته أنثي

وهو برضه عمره ما داس طَرْف واحدة فيهم

يعني بديع كان عايش في اللحم

وكان سؤال: امتي ها تتجوز يا بديع بقي!؟

سؤال بيخنق رقبتة

وابتدأ يزهد من مسخرة الناس عليه

وكان كل ما حد يسأله يقول له:

لما يريد الله!

بس هما في البلد كلموا الشيخ عبد الراضي المأذون

وها ارواح علي الخميس اللي جاي وادخل

وبديع ما كانش بيعرف من الأيام غير الخميس

وما كانش يعرف من شهور السنة غير الشهور القبطية ..

ومن كتر ما كان بيمسح

ويعمل شغل البيت كانت عنده خشونة في رُكْبُهُ

وكان صعب عليه خالص لما يروح الجامع ويصلي الجمعة

مسكين مش قادر يركع

كان اكثر من واحد بيحاسبه بالنبياة عن الله

أصل احنا كده البشر من خياباتنا

حتي الأحلام والأمنيات بنخفقها
اركع حلو يا بديع وبطل هرجلة
قال له واحد منهم
راح بديع قال لهم:
مش قادر اركع.. ركبي وجعاني
قاله واحد منهم:
واحنا ها نعملك ايه؟!
رد عليه:
انت مش ها تعمل
ربنا اللي يعمل
يا اما يشفيني ويخفف رُكَبِيَا
أو يعتقني من الصلاة بتاعته!
كان يروح بلدهم و يبجي مَشِي
الأسفلت كان بياخد من كعابه الأكلاشيه
دايما مكسيّة عينيه بالهموم
ومش باين من الطين غير شعر راسه
كان يوماتي وهو رايح يجيب الفطار في الصبح
وهو فايت يصبح علي الكل
حتي عمّ عبيد اللي اتوفي ودكانته مقفولة

ما كانشي بينساه ولازم يصبح عليه
كل الناس اللي بديع شافها من ساعة ما جه الشارع
حتي اللي مات منهم
كان عايش جواه
والناس يضحكوا عليه لما تيجي سيرة حد ميت
وبديع كان يقول: الله يمسيه بالخير .
أصل عمّ عبيد المكوجي كان جدع
كان صدره سايع الناس
وطبعًا الجيران لبعضيها
لو معاك دلوقت ادفع
لومش معاك نقضيها
وزي ما قولت من ثانيه الناس لبعضيها
ويوم ما مات عمّ عبيد
قلب كل حي اتشق نُصين
يوميها كان في صوان فرح منصوب في الشارع
وواقف النبطشي بيأف الكلام ويدوروا
وكانت المكوي الحديد بترن علي القاعدة الحديد برضه
يوم عادي ومش كل اللي جوا الناس صباح الخير
يعني الحياة برضه شقا

يعني مش كلها شم نسيم

يعني عم عبيد المكوجي بيحبيب لقمته ولقمة عياله من فرد ياقه
القميص

وساعات بيحبيها من كسرة بنطلون ولد عايق ممكن تسن عليها
الموس..

يعني النهارده يوم عادي والنَّاس رايحة وجاية عادي

يعني الخمس شمعات دول جايين من الحاج عثمان

يعني ملك الألوان وصاحب جملة "مَسْكَةُ الْفُرْشَةِ فن" ..

يعني الليلة فرح وناصب صوانه علي أول الشارع

يعني عم عبيد كان يغيب ويدي الوابور كَبَّاس

ويرجع ياخذ له نظره من الفرحة

يعني شايف شغله ومش حارم نفسه من حاجة

كان مشغول علي فاضي

والفرح بيثغي بنات بتعصي وتراضي

يعني عم عبيد قلبه مكوي لكنه كان راضي

كان واقف بيستعجله شاب مستتي القميص والبنطلون

يعني نفسه يلحق يروح الفرحة قبل وهج البنات ما ينطفي

يعني الشاب استعجله كمان مرة

يعني عم عبيد عارف ان قلب الشباب حامي

أُعدّل بعدها علي الوابور يستعجله بكباس حامي
وقتها كان لافِت وشه بيبص علي بُنت نزلت في الصوان ترقص
يعني البنت كانت طايبة ولفة الوسط خَلّت عقله راح منه
وزود علي قلبه وعلي الوابور الحِمْل
يبقي لا الوابور اتحمّل ولا هو
يعني النار شبت فيه
وفِضِل يجري والنار خلفه كما الِراية
يعني بدنه اترسم بالنار
والنّاس بتخْلي السكة وتعافر
يعني النار بتلم الناس وتبعدهم
اتعترت رجليه واتكفي
وفوق منه اتكوّمت بطاطين
يعني النار نامت لكن ناره ما نامتش..
يعني عمّ عبيد اتحرق فيه كل حاجة
إلا عيونه اللي كانت بتبص وتوصي..
كان سايب وراه عيّل يا دوب بيحبي
وعيّل سابقه بسنة يا دُوب يعرف يخطي.
وعلشان يرقد ويرتاح ويقفل عيونه وينام النومة الكبيرة
قالوا له عيالِك في عنينا نام وما تخافشي..

راح نام وغمض عنيه
غمضها خالص ومخافشي
رجعوا الشربات تاني
دخلت العروسة علي الساكت
ووقفوا الرجالة ياكلوا في سجاير ويشربوا شاي..
ولمّوا الكوشة والأنوار الملونة
وفضّلت اللمبات الصُفُر
وسابوا الصوان منصوب للعزا اللي جاي

اللي حزن عليه بجد
والحزن شق صدره كان عامر الاحمر
عامر كان ساكن في الحارة اللي في ظهر الدكان
والباب الوراني لبيتهم
لو فتحه علي الاخر بيبقي دراعه في قلب الدكان
عامر كان إنسان
كان عنده لسانه الدافي بيغنيه عن كل الاحزان
كان عارف بالله وكان الله يعلم به
بيصلي الفرض بفرضه
ركابيه دابت من كتر ما صلي

ومن كثر ما حَلَّى سنين عمره ابتهالات
وكان قلبه نضيف

وكان برضه خفيف بيخاف يمشي لوحده في الضلمة
علشان كده عمره ما صلى الفجر في الجامع
اكنم الليل في الوقت ده بيكون دايس الشارع
بس بيقولوا من محبة ربه فيه ابتلاه

كان برضه عامر الأحمر يركع علي ركابيه قدام الصبيان وهما
ورا منه

اكنمه ماكانتش فيه ولا ست لحالها بتهواه
والمسكين كان عايش مع أمه ومعرفش يطّلع عامر الرجل من
جواه

كان عامر بعد ما يفلت من قدامهم
ويزق علبة السجاير في جيب الصبي
ويديله خمسه وسبعين قرش تمن ساندوتش كفته
كان يصرخ للسمما بعتاب وحنين:

يعني خلقت الارض والسمما والبحور والجبال
واللي طاير واللي حاطط
والصايم والفاطر
والعاصي والتايب

ومش قادر تخليني طاهر!؟
حتي في شهر رمضان زرعت روعي بالمذلة
وحنيت ضهري قدام كل الصغار
ليه حوجتني ليهم؟
وانا باملك زي ما ليهم !
غير بس انت اللي حنيت راسي
وقليت قيمتي وقيمته
مسكين عامر
حتي لما كان بيزتق ع الحريم في المخبز
علشان يجيب عيش
السنات مش بيزعلوا
والرجاله كانوا بيحسدوه
وهو مسكين
ده حتي في مرة قال:
يا ريتني زي أوديت أو عبد العزيز
بس اللي فيا ينصفني
واللي فيا يبقي الصح مش البراني
كان نفسه يكون من ثاني
حتي لو فضل يكنس ويمسح ويطبخ لامه

من غير ما يدوس علي نفسه ويكسرها
ويعضّ من الحاجة علي صباعه
كان نفسه يرجع بيته
من غير ما يكون متعلق ولد ابن اربعتاشر في دراعه
كانت دائماً أم رَحِيم لاضمه قلبها في وجعه
زعلانة عليه وتقول:
أمه مش جدعه معرفتش تقوم الراجل فيه
وسابته مدهون راجل من بره
لكن من جواه حمامة راقد علي البيض
زي طير وجناحه بيكسي جنابه
لكن عمره ما فرده وطار
انا لو منها.. ألسعه في محياه بمعلقة سخنه
يمكن يلقاه لما يتسلّخ
طيبب دانا ولدي لما اخش أصحّيه من النوم
لازم أقول:
يا مشالله الواد اللهم احفظه
يقدر يسند بيه الجبل لو مال
وانا زي ام عامر هجالة عليه من زمان لكن خليته راجل
حتي لما البتّ اللي كان غاويها كسرته

من بعد ما كان نايماً قائماً عندها
قلت له اسمع يا واد:
اوعاك تقف قدام باب وتخبط عليه
وانت في يوم من الأيام كنت الوحيد اللي معاك مفتاحه..
اوعاك!

أم رحيماً طول عمرها
لا عندها عيلاً ولا تيّلاً
كان كله كلام
من كُتِر ما كانت مجروحة
من حنينة راس عامر للأيام
و أم رحيماً يا دوووب
كان اسم
لكن الحرف بيطلع منها زي النُّطفة
بيطلع منها دم ولحم وعضم وجسم
ما كانش عندها زوج
كانت فعلاً هجالة
لكن ليها فكل بيت من بيوتنا
رِجالة

ولسه الستات العجايز في شارع الصابحة
كل ما يشوفوني يجيبوا في سيرة الخالة أم رَحِيم
ويسألوني:

يا ريت يا اولاداتي تعملوا بوصيتها ليكوا
وانتو حوالين سريرها

لما كانت روحها بتتمرجح جواها
وقالت لكم ساعتها:

اسمعوا يا اولاداتي

اوعاك تقفل طاقه كانت مفتوحة بينك وبين النور
ولا تحط علي بابك تراس من جوه

الخُطاة بس يا ابني اللي ببسجنوا نفسهم بايديهم
ويوم ما تحس ان قلبك بقي نَيَّ أو طَرِي

اعرف ان اللي بتحبهم هجره ومشيو من جواه
وانت داخل بيتكم ابقى اخلع مداسك

مش علشان تحفظوا من الوسخ

لكن علشان ما تدعش بمداسك

علي ارواح الحبايب

اللي منتتورة في كل مكان جوه البيت اللي كان قانيهم
واضحكوا في وش بعض

واحفظوا وشوش بعض صم
وكل واحد فيكم يكون كتف للتاني لو مال
ده انا يا أولادي
لما كنت بادخل أي بيت من بيوتكم
كنت لو شميت ضهر إيدي باشبع
وكونوا زي ابونا يوسف
اللي كان دائماً يسعي للخير
وإيديكم زي إيديه
يا ما خبزت خير للناس
واللي كان يخطب علي بابيه
عمره ماسأله اسمك ايه؟!
كانت ايده سابقه بتفتح الرقاص
وكونوا زي الشيخ محمد كامل
كان الضهر والمغرب والعشا والفجر
مش ببيجوا غير بصوته
وكانوا المسلمين عارفين انه بيقرأ من القرآن
والمسيحيين كانوا فاكرينه بيقرأ من الإنجيل
ما علينا يا أولادي
لكن الغرض خليكوا فاكرين

ان صوت الشيخ محمد كامل

كان هو الصوت الوحيد اللي بيجمعنا بعد أم كلثوم

قولوا لبعض كل ما تتقابلوا:

صباح الخير ومساء الخير ونهارك سعيد وليأتك سعيده

منتشعبطوش في السلامو عليكم والسلام لكم

اللي ها تفرقكم عن بعض

الدنيا اللي شايفانا النهارده

بكره ها تتغرب من غيرنا

لأنها هي اسمها دنيا بينا

علشان كده الخرابات سموها كده

علشان مفيهاش ناس

وكلام ربنا هو كلامنا

ولا كان كلامه ها بيبقي كلام منزل غير بينا احنا

ولا عمر السواقي دارت علشان تسقي الحلفا

طول عمر السواقي دايره

علشان تخضر قلوبنا قبل النباتات

واللي بات فيكم من غير عشا

جوفه الخالي يلسع قلوبكم

ده انا ياما فرطت الرمان في حجري

وكننوا بتلقطوه زي الكتاكيت الخضر
افرطوا ايديكم ومتموهاش غير علشان تضموها
وانتم بتسندوا بعض
او الواحد منكم يطبق رغيف علي الغموس علشان يطعم اخوه
او أي حد دق الباب بسؤال
وخليكم فاكرين
ان يهوذا لما باع سيده بتلاتين حنة من الفضة
المبلغ ده وقتها مكانش ممكن يشتري حاجة
ولا أي حاجة
بس كان علي قد البيع بس
بُصّوا لشارع الصابحة
يا ما عبّي ناس ويا ما فضّي
ويا ما كان فيه ناس ذهب
وكان فيه ناس فضة
عمر النحاس فيه ما خطي
بصوا لشارع الصابحة
قد ايه بيوت فيه علّيت
وبيوت مالت
قد ايه فيه هجروا وعاشوا

وقد ايه ناس ماتت
حتي حيطان البيوت اللي فيه
من كُتر البُكا باشت
وقد ايه فيه ناس الفرحة منحوتة علي وشوشهم
زي قرص الشمس
وقد ايه ناس مكسيّة عيونهم بالهموم
مش باين من الطين غير شعر رأسهم
وفيه اللي بقي الشقا مقاسهم
يبقي يا أولادي وقت النفسين اللي جوايا ما يتبخروا والأمر العالي
ينفذ
اوعاكو تجيبوا لي الغالي من الأكفان
أنتم بس لموا العضميتين علي رطلين اللحم اللي عليهم
وزُقوني في المنامة
وابقوا سيبوا علي قبري علامة
مع أني عارفه مفيش حد ها يحيي علي ركايبه علشان يدخل يُشق
علي الانسان
انا راичه وانتوا جايين
واللي عديته لورا زي اللي عديته لقدام
وزي ما كان عندي عيال في بيوت النصارى

عندي برضه عيال في بيوت المسلمين
يبقى اللي باقي لكم الشارع والبيوت
والناس اللي باقية فيه
وأنتم الشاهدين علي اللي راح واللي جاي
وعلي آخر شفقة بتشربها الخالة أم رحيم
من آخر كوباية شاي.

شاعر وكاتب مسرحي

مواليد عام ١٩٦٩

ملوي - المنيا

يقيم منذ ١٦ عامًا في الولايات المتحدة الأمريكية

له:

- ١- "ملح في جرح" مسرحية، جائزة الثقافة الجماهيرية بمهرجان نوادي المسرح.
- ٢- "حكمة المجانين" مسرحية، جائزة المركز الأول على مستوى الجمهورية.
- ٣- أشعار وأغنيات لعدة مسرحيات بالهيئة العامة لقصور الثقافة.
- ٤- "دوّقت صوتها للحمام غني" (شعر).
- ٥- "دائرة الأحلام" فيلم قصير مشروع تخرّج في معهد السينما من إخراج شريف وهبة.